

समं. 09-20 Hrs

Headlines

1. उपराज्यपाल मनोज सिन्हा होरें आखेआ ऐ जे केन्द्र सरकार स्हेई समें पर जम्मू कश्मीर गी राज्य दा दर्जा देने लेई वचने बज्झी दी ऐ ते लोकें कन्नै कीता गेदा एह वायदा जरूर पूरा कीता जाग।
2. श्री अमरनाथें दी यात्रा 2 लक्ख दा आंकड़ा पार करी चुकी ऐ। उपराज्यपाल इस मौके खुशी प्रगट करदे होई सब्बने गी सफल यात्रा लेई शुभकामनां दित्तियां न, जम्मू थमां 6 ज्हार कोला मते श्रद्धालुएं दा नमां जत्था घाटी लेई रवाना।
3. मुख्य सचिव अटल डुल्लू होरें बालटाल आधार शिविर पर प्रबंधें ते सुविधाएं दा जायजा लैता, उनें बेस अस्पताल दा बी निरीक्षण कीता।
4. तापान दे ओसाका च आयोजित विश्व एक्यो च जम्मू कश्मीर च होई दी तकनीकी तरक्की सब्बने लेई आकर्षण दा केन्द्र बनै करदी ऐ।
5. श्री माता वैष्णो देवी श्राइन बोर्ड नै रियासी च 5 नमं मंदरें गी अध्यात्मिक केन्द्रें दे रूपै च लोकें दे नमित कीता ऐ।

<><><><><><>

LG Statehood(byte)

उपराज्यपाल मनोज सिन्हा होरें आखेआ ऐ जे केन्द्र सरकार उचित समें पर जम्मू कश्मीर गी राज्य दा दर्जा ब्हाल करने आस्तै पूरी चाल्ली वचने बज्झी दी ऐ। इक नीजि टी.वी. चैनल गी दित्ते गेदे इक इंटरव्यू च उपराज्यपाल होरें वायदा कीता जे जम्मू कश्मीर दे लोकें कन्नै कीती गेदी प्रतिबद्धताएं गी पूरा कीता जाग। उनें दस्सेआ जे दफा 370 दे हटने दे परैंत केन्द्र शासत प्रदेश शांति, विकास ते सार्वजनिक जुड़ाव बधाने दी विशेषता आले इक नमं युग च दाखल होआ ऐ। उपराज्यपाल होरें जोर देइयै आखेआ जे बक्ख-बक्ख खेत्तरें च महत्वपूर्ण तरक्की कीती जा'रदी ऐ ते सरकार समावेशी विकास ते रियासता गी बढ़ावा देने पर ध्यान केन्द्रित करा दी ऐ। उनें आखेआ.....बाईट

<><><><><><>

Amarnath Yatra

इस ब'रे अमरनाथ यात्रा करने आहले श्रद्धालुएं दी गिनतरी कल दो लक्ख था मती होई गई ऐ। अधिकारियें दस्सेआ ऐ जे कल श्रीअमरनाथ गुफा च 17 हजार सोयां मते श्रद्धालुएं पावन हिम शिवलिंग दे दर्शन कीते। हुनै तगर कुल दो लक्ख 63 हजार यात्री अमरनाथ गुफा दे दर्शन करी चुके दे न। उनें दस्सेआ जे यात्रिएं च 12 ज्हार 210 मर्द, 4 ज्हार 202 महिला, 264 न्याणें, 103 साधु, 18 साधवियां, 6 ट्रांसजेंडर ते 514 सुरक्षाकर्मी शामिल हे। इक सोशल मीडिया पोस्ट च उपराज्यपाल मनोज सिन्हा होरें तीर्थयात्रिएं दे पवित्र यात्रा लेई उत्साह पर खुशी जाहर कीती। उनें आखेआ जे एह जीवन भर दी इक पवित्र यात्रा ऐ ते सब्बै श्रद्धालुएं गी परमात्मा दी खोज ते अनुभव करने आस्तै मता मता सुआगत ऐ। इस मौके पर तोआई अज्ज जम्मू दे भगवती नगर आहले आधार शिवर था 6 हजार इक सौ 43 श्रद्धालुएं दा इक होर जत्था घाटी लेई रवाना होआ। इन्दे च कुल 4 हजार 691 मर्द इक हजार 248 महिला, 17 बच्चे, 167 साधु, ते 20 साधवियां शामिल हियां। श्री अमरनाथ यात्रा 3 जुलाई गी शुरु होई ही ते एह रक्खड पुन्नेआ आहले दिन यानि 9 अगस्त गी सम्पन्न होई जाग। आकाशवाण समाचार कन्नै गल्ल करदे होई यात्रिएं अपनी खुशी इस चाल्ली सांझी कीती.....

<><><><><><>

CS-Baltal(byte)

मुख्य सचिव अटल डुल्लू होरें बालटाल आधार शिविर दा दौरा करियै चला'रदी श्री अमरनाथ जी दी यात्रा 2025 दे प्रबंधें दा जायजा लैता। अपने दौरे दरान उनें सुविधाएं दी समीक्षा कीती, बेस अस्पताल ते सांझे पुलस नियंत्रण कक्ष दा निरीक्षण कीता ते तीर्थयात्रियों ते सेवादारें कन्ने गल्लबात कीतीं तीर्थयात्रियों प्रशासन दे जतनें दी तरीफ करदे होई इंतजामें पर संदोख जाह्र कीता। उनें आखेआ.....बाईट

मुख्य सचिव होरें सुरक्षत, सुचारू ते शैल चाल्ली समन्वित यात्रा जकीनी बनाने दी सरकार दी वचनबद्धता गी पक्का कीता। उंदे कन्ने आए दे अधिकारिएंतीर्थयात्रा दे दुरान सेवा ते सुरक्षा दे उव्व मानकें गी बनाई रखने आस्तै लगातार निगरानी दे महत्व पर जोर दिक्ता।

<><><><><><>

Japan World Expo

जापान दे ओसाका शैहरे च आयोजित वर्ल्ड एक्सपो-2025 नमैश च जित्थें भारत दी इंजीनियरी दे शानदार नमूने दिक्खने गी लब्बै करदे न उत्थें गै जम्मू कश्मीर दे एतिहासक प्रोजेक्ट बी सब्बने दे आकर्षण दा केन्द्र बना करदे न। चनाह् दरेया पर बने दा दुनिया दा सब्बने गिमां बड्डा रेलपुल, अंजी खड्ड आला पुल ते हिमालये दी पहाड़ी श्रृंखला दे शानदार नजारे दे दरमयान तेजिया कन्ने द्रौड़दी वंदे भारत एक्सप्रेस रेलगड्डी दा प्रदर्शन सब्बने दा ध्यान अपनी भेठा खिच्चै करदा ऐ। दुनिया भरै दे लोक जम्मू कश्मीर च तैआर कीती गेदी इंजीनियरी दी शानदार मसाल दी सराहना करै करदे न। नमैश च भारत च राष्ट्रीय सतह पर होआ'रदी तरक्की, तकनीकी विकास ते कुदरत दे अनेकूल विकास आली नीति दी बी बड़र मती सराहना होआ करदी ऐ।

<><><><><><>

Reasi-Temples

आध्यात्मिक विरासत गी बढ़ावा देने बक्खी इक महत्त्वै आली गैह् पुट्टदे होई श्री माता वैष्णो देवी श्राइन बोर्ड नै रियासी जिले दे बक्ख-बक्ख हिस्सें च नें बनाए गेदे 5 मंदरें गी लोकें दे नमित कीता ऐ। नमें आध्यात्मिक केन्द्रें दे तोरा पर तैआर कीते गेदे एह् मंदर जिले दे गोरता कालिका स्थान, डंगाकोट, टोट, देवीगढ़ ते चसाना च बनाए गे न जिंदी दिक्खभाल ते रखरखाव ग्राएं दे मकामी लोकें आस्सेआ कीता जाग जेहदे च रोज पूजा ते आरती दा सरिस्ता ते परानिएं परम्पराएं दा संरक्षण शामिल ऐ। अधिकारिक जानकारी मूजब इस पैहल कन्ने नां छड़ा इलाके च प्राचीन सांस्कृतिक परम्पराएं गी मजबूती हियोग सगुआं यात्रुएं गी इक सुरक्षत ते अरामदायक यात्रा दा अनुभव बी हासल होग। इनें मंदरें दे खुल्लने कन्ने आध्यात्मिक गतिविधिएं गी बी बढ़ावा थहोग।

<><><><><><>

Shravan Monday(Dispatch)

अज्ज सौन म्हीने दा पैहला संगार ऐ ते इस मौके दे बाकी हिस्सें आला लेखा जम्मू प्रांते दे सब्बने शिवालयें च भगतें दा बड़ा मता रश दिक्खने गी लब्बै करदा ऐ। बडलै मुंह न्हरे थमां गै श्रद्धालु दुध, गंगाजल, बिलपतरी, भंग छतूरा ते फुल्लें दे हार लेइयै शिवें दे जल ढाला करदे न। मंदरें च हर हर महादेव ते ओम नमः शिवाय दे मंत्रोचरण कन्ने चबक्खिया भक्तिमय माहौल बनी गेदा ऐ। इस मौके लोक पवित्र नदिएं, सरोवरें दे घाटें पर शनान बी करे करदे न। केई थाहरें लोकें बडलै सवेला थमां गै लंगर बी लाए दे न। जम्मू प्रांतै दे बक्ख-बक्ख जिले थमां सौन म्हीने दे पैहले सोमवार दे मौके मंदरें च रौनक ते रश दे समाचार हासल होआ करदे न। उधमपुर थमां इक रिपोर्ट कन्ने साढ़े जिला संवाददाता.....बाईट

<><><><><><>